



- SENAT -

Broj: 01-8-1/23

Sarajevo, 13. 04. 2023. godine

Z A P I S N I K
SA 35. VANREDNE SJEDNICE SENATA
UNIVERZITETA U SARAJEVU ODRŽANE 13. 04. 2023. GODINE

Prisutn/e članovi/ice Senata: Prof. dr. Rifat Škrijelj, rektor, prof. dr. Tarik Zaimović, prof. dr. Dženana Husremović, prof. dr. Enita Nakaš, prof. dr. Dušanka Bošković, prof. dr. Tamara Karča Beljak, prof. dr. Mirza Dautbašić, prorektori/ice i Edin Maslo, student-prorektor, prof. dr. Dubravka Pozderac-Lejlić, prof. Zoran Mlinarević (po ovlaštenju), prof. dr. Erdin Salihović, prof. dr. Ahmet Alibašić, prof. dr. Jasmin Ahić, prof. dr. Sead Turčalo, prof. dr. Ifet Mahmutović, prof. dr. Ahmed Ahmić (po ovlaštenju), prof. dr. Arzija Pašalić, doc. dr. Mirza Dedić (po ovlaštenju), prof. dr. Kenan Šljivo, prof. dr. Samir Dolarević, prof. dr. Amina Valjevac, prof. mr. Ališer Sijarić, prof. dr. Sanela Rustempašić (po ovlaštenju), prof. dr. Vedad Falan (po ovlaštenju), prof. dr. Zinka Grbo, prof. dr. Nusret Drešković, prof. dr. Muhamed Ajanović, prof. dr. Ahmet Lojo, prof. dr. Muhamed Smajlović, prof. dr. Naris Pojskić, prof. dr. Rasim Muratović, dr. sc. Jasmin Hodžić, prof. dr. Enra Mehmedika-Suljić (po ovlaštenju), mr. sc. Biljana Zarić (po ovlaštenju), prof. dr. Emir Tahirović, te predstavnici/e Udruženja Studentski parlament Univerziteta u Sarajevu: Faruk Dević, predsjednik, Emin Zaimović i Mumin Velić (po ovlaštenju).

Odsutni/e članovi/ice Senata: prof. dr. Jasmina Selimović, prof. dr. Jasmin Velagić, prof. dr. Darko Tomašević, prof. dr. Izet Bijelonja, dr. sc. Aladin Husić, dr. sc. Sedad Bešlija, Naida Bašić, Jasmin Fazlić, Damir Džubur i predstavnik studenata ispred Vijeća Grupacije umjetnosti.

Ostali/e prisutni/e: Kenan Filipović, generalni sekretar i Berina Smajlović Doljančić, šefica Službe za pravne poslove.

Sjednica je počela u 13:00 sati.

Sjednicom je predsjedavao prof. dr. Rifat Škrijelj, rektor Univerziteta u Sarajevu.

Utvrđeno je da sjednici prisustvuje 38 članova/ica Senata sa pravom glasa, od toga 8 (osam) članova/ica sa ovlaštenjem koje se nalazi u dokumentaciji Senata.

Shodno velikom interesovanju predstavnika medija za održavanje današnje sjednice, prof dr. Rifat Škrijelj predložio je članovima i članicama Senata da prije početka sjednice predstavnici medija uđu u Svečanu salu i naprave kratke snimke.

Uz jedan (1) glas „Protiv“ i jedan (1) „Suzdržan“ glas, prihvaćeno je da prije početka sjednice predstavnici medija uđu u Svečanu salu i naprave kratke snimke.

Nakon što su predstavnici medija napustili Svečanu salu, prof. dr. Rifat Škrijelj pozvao je članove i članice Senata da se izjasne o predloženom Dnevnom redu.

Uz jedan (1) „Suzdržan“ glas usvoje je slijedeći

D N E V N I R E D:

1. Rješenje Kantonalne uprave za inspekcijske poslove – Inspektorat prosvjetne inspekcije broj: UP-1-14-12-34-05766/23-12705 od 03. 04. 2023. godine

T O K S J E D N I C E:

Ad-1.

Prof. dr. Rifat Škrijelj je u uvodnom izlaganju istakao da je današnja sjednica sazvana u cilju informisanja članova i članica Senata sa Rješenjem Kantonalne uprave za inspekcijske poslove – Inspektorat prosvjetne inspekcije broj: UP-1-14-12-34-05766/23-12705 od 03. 04. 2023. godine, kojim je naređeno Univerzitetu u Sarajevu da u vezi sa sticanjem diplome doktora medicinskih nauka Sebije Izetbegović upisane pod rednim brojem 1890 u Matičnoj knjizi koja se vodi kod Univerziteta u Sarajevu od 1990-2008. godine od broja 1481-2276, primjeni član 77. stav (1) i (2) Zakona o visokom obrazovanju („Službene novine Kantona Sarajevo“ broj 36/22), te da je rok za izvršenje upravne mjere je 15 (petnaest) dana od dana prijema rješenja. Također je istakao da je s tim u vezi na Univerzitetu u Sarajevu zaprimljen Zahtjev Vijeća Univerziteta u Sarajevu – Medicinskog fakulteta za izjavljivanje žalbe na predmetno Rješenje Kantonalne uprave za inspekcijske poslove – Inspektorat prosvjetne inspekcije. Prof. dr. Rifat Škrijelj je naglasio da je Univerzitet u Sarajevu – Medicinski fakultet trebao dostaviti dokaze kojim se može osporiti činjenično stanje koje je utvrdio Kantonalni prosvjetni inspektor za visoko obrazovanje i koji bi predstavljali osnovan razlog za podnošenje žalbe na predmetno Rješenje. Također je istakao da je u konkretnom slučaju Univerzitet u Sarajevu - Medicinski fakultet trebao dostaviti dokaz da je dr. Sebija Izetbegović položila sporne ispite na Univerzitetu u Sarajevu - Medicinskom fakultetu, odnosno dokaz da je imenovana dostavila Univerzitetu u Sarajevu - Medicinskom fakultetu vjerodostojno uvjerenje da je položila sporne ispite na Medicinskom fakultetu Sveučilišta u Zagrebu ili nekom drugom fakultetu. Zaključujući svoju diskusiju, prof. Škrijelj je naglasio da bez navedenog dokaza ne postoji valjan razlog za podnošenje žalbe, te se ne može zahtijevati ni očekivati ulaganje iste.

U vezi sa tačkom dnevnog reda današnje sjednice prof. dr. Rifat Škrijelj je otvorio diskusiju.

Prof. dr. Enra Suljić-Mehmedika je istakla da je potrebno pravno tumačenje u vezi sa odlučivanjem na današnjoj sjednici s obzirom da u ponoć ističe rok za žalbu na predmetno Rješenje. Također je istakla da se pitanje primjene član 77. stav (1) i (2) Zakona o visokom obrazovanju odnosi na poništenje diplome, dodatka diplomi i uvjerenja o stečenom zvanju, te da se predmetno Rješenje odnosi na poništenje upisa u matičnu knjigu.

Prof. dr. Amina Valjevac je informisala članice i članove Senata da je o aktivnostima u vezi sa predmetnim slučajem informirala Vijeće Univerziteta u Sarajevu – Medicinskog fakulteta, te da je Vijeće smatralo da je potrebno u konkretnom slučaju iscrpiti sve pravne mehanizme, te je s tim u vezi i prosljeđen stav Vijeća Univerziteta u Sarajevu – Medicinskog fakulteta od 10. 04. 2023. godine.

Prof. dr. Muhamed Ajanović je istakao da podržava prof. dr. Rifata Škrijelja u njegovom stavu da ne postoje valjani razlozi za podnošenje žalbe na predmetno rješenje, odnosno da nisu dostavljeni dokazi kojim bi se osporilo utvrđeno činjenično stanje od strane Kantonalnog Inspektora. Također je istakao da se u konkretnom slučaju ovo tijelo ne može baviti formama već suštinom problema.

Gospođa Berina Smajlović Doljančić je istakla da je primjena člana 77. Zakona o visokom obrazovanju vezana i za matične knjige, jer je štampanje diplome samo konkludentna radnja. Također je istakla da je ranije usvojenom Analizom Komisije ovo pitanje detaljno interpretirano. Gospođa Smajlović Doljančić je naglasila da se broj pod kojim se lice vodi u matičnoj knjizi vezuje i za broj diplome.

Gospodin Kenan Filipović vezujući se za diskusiju prof. dr. Enre Suljić-Mehmedika podsjetio je članice i članove Senata da se predloženim zaključkom Senat samo informiše o donesenom Rješenju Kantonalne uprave za inspeksijske poslove, te da se s tim u vezi daje saglasnost Rektoratu kao licu ovlaštenom za zastupanje Univerziteta u Sarajevu da postupi po naloženoj upravnoj mjeri, pri tome uvažavajući činjenicu da je cjelokupni postupak vodila Kantonalna uprava za inspeksijske poslove, te da je Univerzitet u Sarajevu u konkretnom slučaju bio također predmetom inspeksijskog nadzora. Gospodin Filipović je također istakao da je cjelokupna problematika trebala biti razmatrana i sa etičkog aspekta.

Gospodin Edin Maslo je naglasio da se na Senatu također treba raspravljati i o problemima sa kojima se susreću studenti koji su oslobođeni školarine, a koji do ovog trenutka ne znaju svoj status. Također je istakao da se treba diskutirati i o valjanosti diploma Univerziteta u Sarajevu u državama Evropske unije, posebno sa aspekta budućeg upisa studenata i ostanka studenata na Univerzitetu u Sarajevu.

Nakon što je konstatovano da nema više prijavljenih diskutanata, prof. dr. Rifat Škrijelj pozvao je članice i članove Senata da se izjasne o predloženom Zaključku Senata.

Uz 30 glasova „Za“, 2 (dva) glasa „protiv“ i 6 (šest) „Suzdržanih“ glasova, donesen je slijedeći

ZAKLJUČAK

Daje se *saglasnost* rektoru Univerziteta u Sarajevu, kao licu ovlaštenom za zastupanje Univerziteta u Sarajevu, da izvrši upravnu mjeru utvrđenu Rješenjem Kantonalne uprave za inspeksijske poslove, Inspektorata prosvjetne inspekcije broj: UP-1-14-12-34-05766/23-12705 od 03. 04. 2023. godine.

O b r a z l o ž e n j e

Dana 05. 04. 2023. godine Univerzitet u Sarajevu je zaprimio Rješenje Kantonalne uprave za inspeksijske poslove, Inspektorata prosvjetne inspekcije broj: UP-1-14-12-34-05766/23-12705 od 03. 04. 2023. godine, kojim se naređuje Univerzitetu u Sarajevu da u vezi sa sticanjem diplome doktora medicinskih nauka Sebije Izetbegović upisane pod rednim brojem 1890 u Matičnoj knjizi koja se vodi kod Univerziteta u Sarajevu od 1990-2008. godine od broja 1481-2276, primjeni član 77. stav (1) i (2) Zakona o visokom obrazovanju („Službene novine Kantona Sarajevo“ broj 36/22). Rok za izvršenje upravne mjere je 15 (petnaest) dana od dana prijema rješenja.

S tim u vezi, rektor Univerziteta u Sarajevu je na 35. vanrednoj sjednici održanoj 13. 04. 2023. godine upoznao članove/ice Senata Univerziteta u Sarajevu o donesenom Rješenju Kantonalne uprave za inspeksijske poslove, Inspektorata prosvjetne inspekcije broj: UP-1-14-12-34-05766/23-12705 od 03. 04. 2023. godine.

U odnosu na izrečenu upravnu mjeru, konstatira se da je članom 77. stav (1) i (2) Zakona o visokom obrazovanju utvrđeno da je visokoškolska ustanova obavezna poništiti i oglasiti nevažećom diplomu, dodatak diplomi i uvjerenje o stečenom zvanju u slučaju ako imalac diplome nije ispunio sve ispitne obaveze na studiju na način i prema postupku koji je utvrđen propisima iz oblasti visokog obrazovanja koji su bili na snazi u vrijeme izdavanja javne isprave, ovim zakonom i studijskim programom visokoškolske ustanove i da se oglašavanje nevažećom diplome, dodatka diplomi i uvjerenja o stečenom zvanju objavljuje se u „Službenim novinama Kantona Sarajevo“.

Uvažavajući navedeno Rješenje Kantonalne uprave za inspeksijske poslove, Inspektorata prosvjetne inspekcije, donosi se zaključak kao u izreci.

Sjednica je završena u 13:50 sati.

R E K T O R

Prof. dr. Rifat Škrijelj, s.r.

Zapisničarka:

Alma Voloder-Madacki, dipl.iur. s. r.